

四川通志卷三十五

輿地志 三十四

祠廟 二

重慶府

巴縣 附郭

文廟在府城北 詳見學校祀典各廳州縣制同

崇聖祠在文廟東

名宦祠在文廟東

鄉賢祠在文廟西

忠義祠在 文廟前

節孝祠在朝天驛內 以上五祠各廳州縣俱有之

關帝廟在府西總督李國英建 各廳州縣俱有之

社稷壇在府城西 附郭不置餘廳州縣制同

風雲雷雨山川壇在府城南 附郭不置餘廳州縣制同

先農壇在府東

國朝雍正六年建詳見祀典附郭不置餘廳州縣制同

城隍廟在府城內 各廳州縣俱有之

東嶽廟在府城東 各廳州縣多有之

文昌祠在府西

各廳州縣多有之

厲壇在府城北

各廳州縣俱有之

大禹廟一在府南門一在南岸塗山上與后塗山氏竝

祀

附

明曹汴記今川東兵憲田公之駐節我郡也

開忠益之賓亭廣咨諏之使務於是於郡東塗

山之麓得禹廟舊址與元臣劉志道所題廟碑焉

顧碑漫缺不可讀乃又於郡志得元臣賈易岩所

撰引東漢郡志及華陽國志諸古籍辯禹之娶於

塗山實茲山也其會諸侯乃在會稽塗山而世遂

以爲娶於彼非也其考旣明備而核足破近世庸

聞之誤而文復爾雅可傳於是公讀之歎曰昔人

睹河洛而思禹功矧梁岷之高山迅川其利鑿疏

導之難殆又倍於河洛而今之享旣藝之利而被

安流之澤者顧漫不知思禹功也乎縱合禹非蜀

人其娶非塗山猶當郡爲之祠廟以報厥萬世永

賴之功而舊籍之可考班班若是其舊址遺碑今
 猶巖然焉而顧坐視其鞠爲瓦礫草莽之墟此豈
 非觀風守土者之責哉遂毅然亟爲重建之舉乃
 首以語我郡守朱君君遂率郡二倅與邑令尹躬
 視其址以復於公公乃隨以督建之役委之衛使
 陳嘉勲且復親爲之指授曰是舉也基視舊址宜
 拓三之二庶廟貌宏邃足壯觀瞻棟宇宜掄梗楠
 之材庶無速朽足垂久述禹位宜遵洪武七年帝
 王廟例塑袞冕坐像庶謁者如見廟益藉以尊嚴
 然茲山以塗后而傳禮宜合祀顧像則弗典仍宜
 前設木主二一稱夏大禹神主一稱夏后塗山氏
 神主庶禹不獨血食而山靈亦與有榮矣第其役
 計費吾帑贖之餘若干而足以此構材以此募役
 可無更役夫里一人也指授既定乃遂移上撫臺
 鍾祥確菴曾公按臺徽州環一郭公旣後先報可
 而爲時分守少參汪公駐涪陵公復以其事告之
 亦欣然贊焉於是嘉勲日在工督建唯亟而城野
 之人顧宴然若不知其有興作也蓋拓基於萬厯

甲戌之冬十有二月至乙亥之春三月廟乃訖工
廟基凡爲臺三臺皆甃石爲之前爲門凡四楹躡
級而上爲亭亦四楹亭後左右各爲房亦各四楹
又躡級而上始爲廟四楹而廟地勝棟隆後依朝
曦之輝面挹郡基金碧之秀龍門抱其下塗洞峙
其左遮灘障其右殆儼然古塗山國之故宮而禹
之像則考宋人所刻聖賢遺像爲之復藹然錫圭
告成之度如生也公於是諏日辨香爰率郡邑長
貳恭謁於廟而告成事退乃顧汴命載筆焉旣而
朱君復以公意申命之而汴遂無容辭也汴唯賈
碑塗山辯甚詳顧未暇及塗山氏之賢之有功於
禹也按漢劉向列女傳稱禹之治水而南也塗山
氏蓋賦倚南之候其後周之二南實取風焉及生
啟禹弗子塗山氏獨能教訓而使之化至立庶子
之官以翼之故禹不惟獲告成功而卒至啟能象
賢繼世以有天下善乎遷固之敘三代后妃之助
曰夏之興也以塗山然則其今日之配茲廟也固
以其生茲山之故然實祀德祀功之典所弗可遺

也汴故繼敘之用補前碑之缺庶昭公之舉也殆
不獨使巴夔之閒睹廟貌而思禹抑將使聞塗山
氏之風者化不在周召之南而在川以東矣其有
裨風教豈小哉於是碑方擬登刻而學憲沔陽陳
公適校士至渝郭公按部偕汪公至聞廟成咸後
先登謁於是時塗林之旄無不躍然快觀也然
公之意以山在江之東岸猶石紐在蜀之西陬皆
冠蓋之所弗經故其傳不甚著也又欲倣之神禹
鄉邦樹石南紀之衢題以塗山舊國以告觀風者
而君去郡矣至是柱史任公來代公出巡於是朱
公具以事白焉任公乃遂諏日登謁且面授嘉勲
亟成公之所未及備也而朱君亦以是月上丁四
日登修嘗祀以肇歲典噫山河幸於數千載之下
有茲曠遇哉汪公名仲川系黃岡田公名子堅系
永寧任公名淮一系盤屋朱君名孟震系新淦其
郡貳趙侯方位倅盧侯晉梁侯棟朱侯崑推官王
侯邦俊暨邑令鄭侯宗學或與經其始或樂觀厥
成而嘉勲則重慶衛指揮僉事蓋終役獨效勞也

法故當備著於篇

國朝王士正詩飛瀑落長虹登臨見禹功山圍巴子國
苔沒夏王宮峒俗烏蠻近畚畊白帝同渝州天塹
地感慨大江東

川主祠在府南門內

各廳州縣多有之

甘寧廟在府西今廢

壁山廟在府城內祀唐安撫使趙延之

三忠祠在府南門內祀巡撫陳士奇知府王行儉

知縣王錫皆有惠政後竝死於獻賊之難列入忠

義傳

國朝王士正詩已失夔門險誰云蜀道難三江潮不到
萬馬競傳餐故國悲張許忠魂泣賀蘭當時渝水

上慷慨白衣冠王爾鑑詩明季之世乾坤裂獻忠
禍蜀更慘切夔門一破趨渝州佛圖失險肆攻劫
荒墳凶具資賊兵揚屍負戴城爲穴一烘城陷通
遠門內乏資糧外援絕卓哉陳撫與二王矢志報
國守貞烈或掉常山舌或噴侍中血舌斷血枯魂
猶結身死尙恨賊不滅忽驚皎日霾復雷怒乎助
乎天心不可測嗚呼自古皆有死泰山鴻毛究別
白貪生順逆寧久生一死名污永難雪三靈雲際
賓帝鄉千秋正氣表奇節我來瞻拜肅冠裳祠外
江聲走鳴咽

李公祠在府城治平寺內祀少保李國英

江津縣

三公祠在縣城內

國朝雍正三年建

二賢祠在縣東七十里二賢山上母雅石公恕讀

書處

忠義祠在縣內

附明劉丙記忠孝士君子立身之大節隨所遇而致力焉使先置重

輕於其閒求無恨不可得也管仲三戰三北謂其
有老母孝矣如國事何溫嶠志復中原絕裾而去
忠矣如老母何仲吾不知嶠則終身以爲恨是二
者可容心於其閒哉吳君伯陽諱景由由進士累
官四川按察司僉事常奉其母以行飲食必親嘗
非公出旦夕不離側母高年安甚乃正德五年蜀
寇暴作斬刈人如草莽郡邑望風塵走盡空君偕
部使俞君巡東川南寇卒至江津江津密邇川南
非隸地俞君顧君何如君曰斯豈愛身擇地時耶
卽率民兵守江津賊絕江攻城累敗去復盡其黨
連晝夜合攻益力君腹背受敵竟遇害垂絕呼聖
上者三老母者二乃仆君旣以身殉國而猶不忘

其母可哀也夫賊入城大掠於羣屍中得君面如生始知君死賊甚悔懼買棺歛君設祭而去其不能長驅入蜀者以君扼其鋒也江津人痛君如父母朝夕悲奠俞君且疏其事上惻然贈君按察副使歸其喪賜葬如制官其子一人爲百戶構其祠俾廟食江津從民欲也逾年予叨左轄蒞蜀爲君痛之未幾俞君期亦滿特以所爲祭君文授余索文豎碑以示久遠時廟未告成予復改官匆匆弗及也今踰三年江津諸生於予舊有一目之雅累申前請予竊歎世之人平居侃侃凜然不撓視一世人若盡出己下而人亦輕信之不疑然一遇尋常授遣係重輕於顰笑輒顧却推避反覆擇而後從況於死生大分能決以義如君哉其爲人概可知矣君平日儻高邁不畱意細務而其所樹立卒表表如此豈其所養者大有所不屑歟又幸遭逢聖明膺此殊典得祿以終母天年而顯揚於無替則君之心於忠孝皆可無恨矣其有補於名教豈淺鮮哉君余邑循令義當有述於俞君不可虛

諾諸生亦以義請也故廟成之詳皆不及書書其大者以風示爲人臣子當知所重焉

長壽縣

華光廟在縣前卽五顯廟

張桓侯廟在縣西宋大觀中邑人於廟前得三印

及珮鈎刁斗上鐫侯名

附宋安剛中記漢自建安以來皇綱廢弛神鼎震覆

姦雄觀釁實生豕心本初孟德之徒磨牙厲吻血視生靈期於吞噬不留遺種昭烈慷慨爲國志在拔拯一時英豪狗義蜂起相與提挈共成大事諸葛關張實爲之最凜冽威風萬夫之雄荊州之役羣盜鼎來公爲後拒畢力盡死以抗羣醜奮髯張目橫戈一叱蛇豕異類褫魄逃遯虞淵之日復耀西南繫公之功迄今手載英靈之氣森聳如在廟食百世在禮固宜樂溫之山下瞰大江公之神爽

實是寓焉自古迄今長在祀典舟行上下與茲土
民奔走奉祀罔不虔至九穀嘉生連被原隰舸棹
往返安流無恙陰相之功在國與民天朝累封進
爵惟王惟是廟宇興建歲久行廊爛頽往來咨嗟
力莫能振郡守李公向者趨朝祇謁祠下再拜祈
禱厥應如響至郡未幾首議修繕自捐金帛衆趨
成之功費雖多了不病民撤去卑陋增飾輪奐開
展地基比舊加倍是役也議興於庚午之冬落成
於辛未之春惟公既有以利其民矣又有以奉其
神民和神安福祿來宜行將以是賀公剛中忝吏
是役知之爲詳敢具以記

永川縣

無專祠專廟

榮昌縣

伍胥廟在縣東北

綦江縣

大禹廟在縣南關

紫雲廟在縣北關內

龍角廟在縣龍角溪

盤龍廟在縣三岔溝

老官廟在縣明月沱

房張祠在縣武廟旁

南川縣

川主祠在縣南門內

銅梁縣

土主廟在縣南唐土寇猖獗犯邑知縣趙延集兵
於六羸山滅之後於茅蓮洞仙去奏封土主建廟
祀之

合州

普澤廟在州城西

附宋黃鐸記普澤廟在州城之西唐威烈侯合州刺史兼渝合

資瀘等州經畧巡撫使趙侯之祠今封威濟顯佑
按軍事推官朱炎舊記廟徬於唐至本朝慶歷三
年太守職方員外郎王君昌符從邦人之請始增
大之洎紹興之初幾及百年棟宇頽剝丹青晦昧

廟吏喻俊文竊議以爲侯之威靈橫被千餘里間
祀典尊崇若遠若近奔走奉祀無或少懈人至不
敢斥稱舉指相示則惶恐變色其敬畏之如此况
吾州乃侯爲令爲守建功之地斯人嚴奉殊絕懇
至今居處不足以妥靈責其可辭耶迺一意勸導
鄉之有力者庀材鳩工肇自乙卯歲爲寢廟又四
年己未跨門爲樓爲左右兩廡爲兩官廳獎者新
之傾者扶之嚴嚴翼翼而廟之體復具中更癸酉
涪江之決州遭巨浸益撤正廟而高廣之興修於
丙子之歲越明年落成廟貌遽嚴繪事從新蓋自
紹興乙卯實始增修而斷手於丁丑凡二十有三
年乃克就緒亦艱乎爲力哉俊文死旣久其子起
一日謂鐸曰吾鄉事神益飲食必祀而廟之興建
則未有知之者重修之歲月舊未有記自是以成
重罹水凡一再增葺起亦力焉盍爲我書之嗚呼
是固鐸所嘗欲論究而未詳者也圖經載大歷中
侯爲巴川令資瀘夷寇掠縣境侯領兵襲之以功
授合州刺史不云某甲子史載大歷十四年異牟

尋與吐蕃合衆二十萬人寇一移茂州一移文一
侵黎雅不云有夷出資瀘欲考其詳而不可得聞
聞長者言州之瑞應山佛祠有鐘在焉侯之所爲
也亟往辨其欸識則侯爲將仕郎守合州巴川縣
令兼南界兵馬使賞紫金魚袋時大歷十三年歲
戊午七月十二日也因釋然而悟曰信矣十三年
之秋侯方在邑則十四年禦寇成功無疑當是時
南詔之患烈矣異牟尋嘯其醜類三道爲寇天子
至爲之發禁衛及幽州軍以援東川夷人乘閒竊
發深入以撼內郡之邑非侯之忠義勇畧遏其奔
突心腹之患可勝諱耶侯既有功於是邦沒而廟
食於此日增月葺祠宇與威德同盛亦其理宜也
旣以語起俾刻石廟中爲記因摹倣前作爲迎享
送神詩繫之於末其辭曰旅芳馨兮湛清酤吟參
差兮坎擊鼓雲旗兮逶迤搖翠旌兮容與巴山壁
立兮玉樹青葱侯之來兮瞬可通靈連蜷兮致告
祝晏族兮朱宮侯睠此方兮旣降旣享撫靈輿兮
顧而欲上願侯兮畱止副我民兮瞻望護罔祿以